



Senin, 01 Januari 2024
Ogen: Perngandungen 3:22-23



"Mbincar Keleng Ate Tuhan"



Selamat tahun baru man banta kerina. Malem kel ateta i bas keleng ate si bereken Dibata erkiteken banci si kepari tahun 2023, dingen si bengketi tahun 2024 enda. Si e kerina jadi erkiteken keleng ate Dibata si la erkeri-kerin iberekenNa man banta. *"Lenga bo keru keleng ate TUHAN perkuah ateNa tetap nge lit....,"*

Wari enda, 1 januari 2024, sialoken tahun si mbaru alu perukuren si mbaru, sialoken tahun si mbaru alu dem keriahen. Tahun baru e me sada peristiwa, i ja Dibata mpetangkas sura-surana nandangi geluhta. Tahun baru ertina si tadingken biak si male jenari si pakai biak si mbaru. Dibata mereken kesempatan man banta gelah sipakekken geluhta erguna nandangi jabunta, keluarganta, lingkungan i ja kita tading bage pe erguna nandangi tinepa Dibata sideban. I bas tahun si mbaru enda, ate Tuhan gelah sibaba geluhta lako ndalanken singena ateNa. Dibata mereken kekelengenNa man banta desken matawari si pultak teptep erpagi-pagi, keleng ateNa e la pernah keru, keleng ateNa e mbincar tiap wari' keleng ateNa e i berekenNa man banta.

I bas tahun si mbaru enda, ate Tuhan gelah kita pe nehken kekelengen alu la erkeri-kerin nandangi sekelewetta. Kai ndia tanda ateta keleng si banci situduhkan man sekelewetta? Mari siukuri! Salah sada si banci si tuduhkan e me : makeken wari-warinta alu la sia-sia, nggeluh alu bujur ras mediate jenari geluhta e ernanam ras erguna min nandangi sekelewetta.

Kesempatan ibereken Dibata i bas tahun si mbaru e gelah geluhta encidahken biak Dibata; e me biak si tetap nehken keleng ateNa nandangi kita anak-anakNa. Selamat tahun baru dingen pakekenlah geluhta alu payo, mehuli jenari tetaplah kita nggeluh erpengarapen man Dibata.